

BARAZA LA WAWAKILISHI ZANZIBAR

Simu Nam. + 255 24 2230602/1

Fax Nam. + 255 24 2230215

Tovuti: www.zanzibarassembly.go.tz



SANDUKU LA BARUA 902,
ZANZIBAR

Barua Pepe: zahore@zanlink.com

HOTUBA YA MAONI YA KAMATI YA SHERIA, UTAWALA BORA NA IDARA MAALUM KUHUSU UTEKELEZAJI WA MAAGIZO YA KAMATI KATIKA MWAKA WA FEDHA 2016/2017 KWA WIZARA YA NCHI OFISI YA RAIS, KATIBA, SHERIA, UTUMISHI WA UMMA NA UTAWALA BORA

Mheshimiwa Spika, nianze kwa kumshukuru Mwenyezi Mungu Mtukufu kwa kutujaalia uhai pamoja na afya njema, ambavyo vimetuwezesha kukutana tena katika Baraza hili tukufu tayari kutekeleza majukumu yetu ya msingi kwa nchi yetu kiujumla. Ninamuomba Mwenyezi Mungu Mtukufu azidi kutukirimu neema zake ambazo kwa hakika sote ni wahitaji kwake.

Mheshimiwa Spika, napenda pia kukushukuru na kukupongeza wewe pamoja na wasaidizi wako, Mheshimiwa Naibu Spika pamoja na Wenyevitani wa Baraza kwa namna mnavyoliendesha Baraza kwa umahiri mkubwa, namuomba Mwenyezi Mungu awazidishie hekma na busara katika jukumu lenu la kutuongoza ili tuweze kutekeleza vyema wajibu wetu katika chombo hiki muhimu kwa nchi yetu.

Vile vile, pongezi za pekee ziende kwa Uongozi mzima wa Wizara hii kwa juhudi zao kubwa na mashirikiano wanayotunesha katika utekelezaji wa kazi zetu, Kamati inawataka wazidi kutekeleza na kusimamia majukumu yao kwa ubora na ufanisi zaidi ili kufikia hatua iliyokusudiwa.

Mheshimiwa Spika, naomba kuchukua fursa hii kuwashukuru sana Wajumbe wa Kamati yetu ya Sheria, Utawala Bora na Idara Maalum kwa namna wanavyonipatia mashirikiano makubwa katika kutekeleza majukumu ya Kamati yetu.

Mheshimiwa Spika, kwa ruhusa yako naomba sasa kuwatambua Wajumbe wanaounda Kamati hii kama ifuatavyo:-

1.	Mhe. Machano Othman Said	Mwenyekiti
2.	Mhe. Mwantatu Mbaraka Khamis	Makamu Mwenyekiti
3.	Mhe. Nadir Abdul – latif Yussuf	Mjumbe
4.	Mhe. Wanu Hafidh Ameir	Mjumbe
5.	Mhe. Saada Ramadhan Mwendwa	Mjumbe
6.	Mhe. Ali Khamis Bakari	Mjumbe
7.	Mhe. Suleiman Makame Ali	Mjumbe
8.	Nd. Ali Alawy Ali	Katibu
9.	Nd. Haji Jecha Salum	Katibu

Mheshimiwa Spika, kwa mujibu wa kanuni ya *108(14)* ya Kanuni za Baraza la Wawakilishi Zanzibar, imetoa fursa ya lazima kwa kila Kamati kutayarisha ripoti ya mwaka itakayowasilishwa katika kikao cha mwezi wa Februari cha Baraza la Wawakilishi Zanzibar kila mwaka.

Mheshimiwa Spika, aidha, kanuni ya *108(15)* ya Kanuni za Baraza, inaelezea kuwa kabla ya kuwasilishwa Barazani utekelezaji wa maagizo hayo, Kamati inatakiwa kukaa na wizara husika kujadili utekelezaji huo.

Mheshimiwa Spika, Kamati kwa kutumia Kanuni ya *106(3)* imepewa jukumu la kufuatilia utekelezaji wa maagizo ya Kamati yaliyotolewa katika Ripoti ya Kamati ya mwaka uliotanguali; ambapo kazi ilifanywa vyema katika kipindi kilichopita na bado Kamati inazidi kufuatilia utekelezaji wa maagizo hayo kila inapoona inafaa.

Mheshimiwa Spika, ripoti hiyo hujumuisha ushauri na maagizo ya Kamati kwa wizara na Taasisi zake inazozifanyia kazi.

Mheshimiwa Spika, Kamati inazifanyia kazi wizara **mbili (2)** ambazo ni:

- (a) Wizara ya Nchi Ofisi ya Rais, Katiba, Sheria, Utumishi wa Umma na Utawala Bora; na

(b) Wizara ya Nchi Ofisi ya Rais Tawala za Mikoa, Serikali za Mitaa na Idara Maalum za SMZ.

Mheshimiwa Spika, Hotuba hii inaelezea utekelezaji wa maagizo kwa Wizara ya Nchi; Ofisi ya Rais, Katiba, Sheria, Utumishi wa Umma na Utawala Bora.

UTEKELEZAJI WA MAAGIZO:

Mheshimiwa Spika, jumla ya maagizo 87 yaliagizwa na Kamati katika mwaka wa fedha 2016/2017 kwa Wizara ya Nchi, Ofisi ya Rais, Katiba, Sheria, Utumishi wa Umma na Utawala Bora.

Aidha, Kamati imefarijika sana na inatoa shukurani zake za dhati kwa Wizara ya Nchi, Ofisi ya Rais, Katiba, Sheria, Utumishi wa Umma na Utawala Bora kwa jinsi walivyoweza kutekeleza vyema maagizo hayo hali inayoonesha ukomavu mkubwa katika utekelezaji wake pamoja na jitihada njema za kuleta maendeleo nchini.

Mheshimiwa Spika, licha ya Wizara kutekeleza vyema maagizo yaliyotolewa na Kamati, kuna wastani wa maagizo kumi (10) ambayo Kamati imeona ni vyema kufanyiwa marekebisho.

Mheshimiwa Spika, Kamati imeitaka Wizara kufuatilia zaidi utekelezaji wa maagizo kwa kutoa maelekezo yafuatayo:

(a) Kamati inashauri vifungu vya fedha vya kuhifadhi Nyaraka vilivyopo Serikalini viwe vinaingizwa Idara ya Nyaraka.

Wizara ifuatilie utekelezaji wa agizo hili na kuandika upya majibu yake kama ilivyoaigizwa.

(b) Kamati inaagiza kupatiwa mafunzo watendaji wa Idara ya Nyaraka hasa wanaohudumia chumba cha kuhifadha nyaraka (*strong room*).

Kamati imeitaka Wizara ieleze kwa usahihi hali halisi ilivyo hivi sasa kuhusiana na agizo hili.

(c) Kamati inasikitishwa na taarifa ya ukosefu wa vitendea kazi muhimu katika Idara ya Nyaraka.

Kamati imeitaka Wizara kuorodhesha vitendea kazi vilivyopatikana hadi sasa badala ya kueleza kuwa vifaa mbali mbali vimenunuliwa.

(d) Kamati inaagiza kufanyiwa haraka uwepo wa Taasisi zilizokosa Ofisi kwa upande wa Pemba.

Mheshimiwa Spika, Kamati imeitaka Wizara kuchukua hatua za haraka kuhakikisha kwamba Ofisi zote zilizo chini ya Wizara hii ambazo hazijafungua Ofisi Pemba, zifungue ili wananchi waweze kupata huduma hizo kwa haraka na kwa wakati.

Aidha, Kamati inashauri Ofisi ya Mdhibiti na Mkaguzi Mkuu wa Hesabu za Serikali kuandaa utaratibu maalum wa kuifanyia ukaguzi *miradi ya maendeleo* inayotekelezwa kwa Fedha za *Mfuko wa Jimbo* ili ukaguzi wa fedha hizo ufanyike kila mwaka na kwa wakati husika ambao fedha hizo zimetolewa.

(e) Kamati inaishauri Wizara kufanya jitihada za makusudi kujenga Mahakama ya Mfenesini, Wete, Konde na Kengeja.

Mheshimiwa Spika, Kamati ilitaka Wizara kuzifanyia ukarabati mahakama hizo ingawa Kamati imeelezwa kuwa kwa sasa kipaumbele cha wizara ni kujenga Mahakama Mpya na ya kisasa Tunguu pamoja na kuifanyia marekebisho Mahakama ya Mwanakwerekwe ambayo utekelzaji wake unaendelea.

(f) Kamati imeona ipo haja ya kuwepo kwa kifungu maalum cha kuwalipa mashahidi.

Mheshimiwa Spika, Katika utekelzaji wa agizo hili, Kamati imeeleza kuwa Mahakama inafanya jitihada za kuwalipa mashahidi ila tatizo linajitokeza kutokana na ufinyu wa bajeti kwa fedha za matumizi mengineyo (OC) ambako hupelekea mashahidi kuchelewa kulipwa stahiki zao.

Mheshimiwa Spika, aidha, Kamati ilitoa msisitizo katika utekelezaji wa maagizo yafuatayo:-

(a) Kamati inaiagiza Wizara kuchukua hatua kwa Ofisi ya Mufti kupatiwa 'vote' yake na kuongezewa bajeti.

Mheshimiwa Spika; Kamati inasisitiza kuendelezwa kwa juhudi za kuipatia fungu lake yenyewe na kuiongezea bajeti Ofisi ya Mufti Zanzibar ili iweze kutekeleza vyema majukumu yake.

(b) Kamati inaishauri Serikali kutilia mkazo suala la sheria ya ndoa ya Kiislamu, ambapo hadi sasa haipo na ni tatizo.

Mheshimiwa Spika, Kamati inatoa msisitizo kwa Wizara kuhakikisha wanaishajihisha jamii kutoa elimu ya ndoa kabla ya kufungwa kwa ndoa ili kuepuka tatizo la wingi wa talaka. Aidha, Kamati imeeleza kuwa Mswada wa Sheria ya Ndoa upo katika hatua za mwisho kukamilika na umeweka kifungu cha Mafunzo ambacho kitapelekea wanandoa kujifunza kabla ya kufunga ndoa.

Mheshimiwa Spika, Kamati inaagiza wizara kuchukua hatua kwa Tume ya Maadili ya Viongozi wa Umma kuharakisha kupatiwa vote yao. Kwa kuwa Tume ya Maadili wa Viongozi wa Umma ni Taasisi nyeti na inatakiwa ifanye kazi zake kwa uhuru, hivyo ni vyema kuwa na vote yao.

Mheshimiwa Spika, Kamati inatoa pongezi kwa Wizara juu ya utekelezaji wa maagizo yafuatayo:-

(a) Kamati inaiagiza kuchukuliwa hatua za haraka za kuajiri waendesha mashtaka na wafanyakazi wengine kwa upande wa Pemba.

Kamati inatoa pongezi kwa Wizara kwa kutekeleza agizo hili kwa kiasi kikubwa ambapo imeweza kuajiri waendesha mashtaka 13.

(b) Kamati inashauri kuchukuliwa hatua na kulifanyia kazi suala la maslahi kwa wafanyakazi wa chini ambao ni kidogo.

Kamati inatoa pongezi za dhati kwa Serikali kwa kutimiza ahadi yake ya kuongeza mshahara wa kima cha chini hali inayopelekea kupunguza ugumu wa maisha kwa wafanyakazi hao.

Mheshimiwa Spika, naomba kuchukua fursa hii tena kuishukuru Wizara kwa mashirikiano yake inayoipa Kamati katika kutekeleza majukumu yake na pia niombe kuzidisha mashirikiano hayo ili kuweza kufikia lengo la Serikali kuleta katika maendeleo nchini.

Mheshimiwa Spika, Naomba kuwasilisha.

Ahsante,

.....

(Machano Othman Said),

Mwenyekiti,

Kamati ya Sheria, Utawala Bora na Idara Maalum,

Baraza la Wawakilishi,

Zanzibar